



OFFICIAL PRESS RELEASE

22 Ma'asi 2016

Fakatokanga ke mea'i 'e he kakai e fonuá 'a e ngāue'aki ta'efakalao 'o e ngaahi kaati fakapangikē 'i he mīsini ATM.

Kuo ma'u 'e he Pangikē Pule Fakafonua 'o Tonga' ha ngaahi fakamatala fekau'aki mo e ngaahi ngāue kākā 'i Fisi 'a ia 'oku ne uesia 'a e ngaahi 'akauni fakapangikē 'a e kau kasitomā 'o kau ai e kau kasitomā 'o e ngaahi pangikē 'i Tonga ni'. 'Oku kau ki heni 'a hono ma'u 'o e ngaahi fakaikiiki 'o e ngaahi kaati fakapangikē mei hono faka'aonga'i 'i he ngaahi mīsini ATM pea mo e mīsini EFTPOS 'i Fisi'.

'Oku lolotonga ngāue atu ai 'a e ngaahi pangikē fakalotofonua' ki hono fakafo'ou 'o e ngaahi kaati Visa 'a e kau kasitomā ne faka'aonga'i 'enau kaati' 'i Fisi 'i he māhina 'e 12 kuo 'osi'. 'Oku fakamahino atu heni ki he kau kasitomā ko ia na'e uesia 'e he palopalema ko 'eni 'o toho ta'e fakamafai'i ai ha pa'anga mei he 'enau ngaahi 'akauni', 'e toe fakafoki atu 'a e lahi 'o e pa'anga ne toho 'ikai fakamafai'i mei ho'o 'akauni' 'i he hili hano fakapapau'i na'e to'o 'i he founa ta'e fakalao.

Ki he kakai 'o e fonua' pea mo e kau ma'u kaati pangikē ne folau atu ki Fisi 'i he ta'u kuohili', 'oku mau tapou atu ke mou siofi homou ngaahi fakamatala 'akauni fakapangikē ke fakapapau'i ne 'ikai ke uesia heni. 'Oku toe fale'i atu foki mei he Pangikē Pule Fakafonua 'o Tonga' ki he ni'ihii 'oku 'i ai ha 'a mou ngaahi kaati pangikē ke mou toe tokanga ange 'i hono faka'aonga'i 'a ho'o mou ngaahi kaati Visá 'i he ngaahi mīsini ATM pea mo e EFTPOS, pea pehē foki ki he taimi 'oku mou faka'aonga'i ai 'a e ngaahi kaati ni 'i he 'initaneti' pehē ki hono fakahoko ha ngaahi fakatau mo e ngaahi totongi koloa pe ngāue 'i he 'initaneti'.

Ko kinautolu ko ia ne uesia 'enau kaati' 'i he ngaahi ngāue kākā ko 'eni, kenau fetu'utaki leva 'i he vave tahá ki he 'enau ngaahi takitaha pangikē. Ki he kau kasitomā ko ia 'a e pangikē BSP kenau kātaki 'o fetu'utaki kia 'Amateila Tonga' 'i he fika telefoni (676) 23-933 'i he extension 6178 pe 'imeili atonga@bsp.com.pg, pea ki he kau kasitomā 'a e pangikē ANZ kenau kātaki 'o fetu'utaki kia Tevita Fakapulua 'i he fika telefoni (676) 20-525 pe 'imeili Tevita.Fakapulua@anz.com.

'E toe lava pē ke fakahoko mai 'e he kau kasitomá ha 'a nau ngaahi līpooti pē lāunga fekau'aki mo e ngaahi ngāue kākā ni ki he Va'a Lāunga 'a e Pangikē Pule Fakafonua 'a Tongá 'i he telefoni (676) 24-057 pe 'imeili nrbt@reservebank.to.

'Oku mau toe fakamanatu atu ki he kakai 'o e fonuá ko hono ma'u 'o ha pa'anga 'i ha founa kākā mo ta'efakalao 'o kau ai 'a hono fakafou 'i hono faka'aonga'i e ngaahi mīsini ATM mo e mīsini EFTPOS ko e hia mamafa ia 'a ia 'e malava pē ke tautea fakatatau ki he tu'utu'uni 'a e Lao ki he ngaahi Hia (Vahe 18) pea mo e Lao ki hono Fe'ave'aki Fakapulipuli 'a e Ngaahi Pa'anga Kākā mo Pa'anga Hiamatea 2000.

Ki ha ngaahi faka'eke'eke kātaki 'o fakafetu'utaki ki he:

Pangike Pule Fakafonua 'o Tonga
Telefoni: (676) 24-057; Fax: (676) 24-201;
'Imeili: nrbt@reservebank.to;
Peesi 'Initaneti: www.reservebank.to